

## **Tapiissutitalimmik illulianik iluarsaassinermut, pitsannngorsaannermut alliliinermullu tapiisarneq pillugu Namminersorlutik Oqartussat nalunaarutaat nr. 42, 11. november 2020-meersoq**

Illuliortiternernut aningaasalersuineq pillugu Inatsisartut inatsisaanni nr. 39, 23. november 2017, § 24b, imm. 4 kingusinnerusukkut Inatsisartut inatsisaatigut nr. 36-kkut, 28. november 2019-imeersukkut allannguuteqartinneqartoq naapertorlugu aalajangersarneqarput:

### **Kapitali 1**

#### *Tapiissutit*

§ 1. Kommunalbestyrelsi tapiissutitalimmik illuliat inuulluataarniutitaqanngitsunik aammalu atortulersuutit atorneqartut nalinginnaasut atorlugit iluarsaannissaannut, pitsannngorsarnissaannut allineqarnissaannulluunniit tapiissuteqarsinnaavoq. Tapiissutit pilersaarusionermut, nakkutilliinermut, atortussanik pisinermut sanasunullu aningaasartuutitut atugassatut tunniunneqarsinnaapput.

*Imm. 2.* Tapiissutit iluarsaanneqarnissamut, pitsannnguissamut allilerinissamulluunniit, taamaalillunilu inissiap aallaqqaammut pitsaassuserisaata atuutsiinnarniarneranut, aammalu inissiap maanna pitsaassuserisaanut atorsinnaassusianullu naleqqunnissaanut iluaqutaasumik tapiissuteqartoqarsinnaavoq.

*Imm. 3.* Inissianut ukiumi qinnuteqarfiusumi februaarip ulluisa aallaqqaataat ukiut 20-t inorlugit sioqqullugu sananeqarsimasunut atorneqalersimasunullu, inissianik iluarsaassinissamut, pitsannngorsaannissamut alliliinissamullu tapiissuteqartoqarsinnaangilaq.

§ 2. Kommunalbestyrelsi ukiumut aningaasaliiffiusumut missingersuutini, kommunalbestyrelsimit akuerineqarsimasuni tapiissutissanut aningaasaliissutissanik immikkoortitsissaaq. Ukiumut aningaasaliiffiusumut aningaasaliissutissat, kommunalbestyrelsip akuerisaasa iluanni aningaasaliissutinit tapiissutissanik neriorsuuteqartoqarsinnaavoq.

§ 3. Kommunalbestyrelsip tapiissutissatut aningaasaliissutaannit minnerpaamik 50 %-it qalissiat, silami iikkat, oqorsaattit kiisalu imermut, kiassarnermut kuuffeqarnermullu atortulersuutit atorlugit iluarsaassinissamut pitsannngorsaannissamullu tapiissutinik qinnuteqaatinut atorneqassapput, taamaattorli tak. imm. 2. Aningaasaliissutit sinneri iluarsaassinissamut, pitsannngorsaannissamut alliliinissamullu tapiissutinik qinnuteqaatinut allanut atorneqassapput.

*Imm. 2.* Qalissiat, silami iikkat, oqorsaattit kiisalu imermut, kiassarnermut kuuffeqarnermullu atortulersuutit atorlugit iluarsaassinissamut pitsannngorsaannissamullu tapiissutinik qinnuteqaatit naammattut tiguneqarsimangippata, aningaasaliissutit sinneri iluarsaassinissamut, pitsannngorsaannissamut alliliinissamulluunniit qinnuteqaatinut allanut atorneqarsinnaapput.

## Kapitali 2

### *Qinnuteqaatit tapiiffisineqarnissamullu neriorsuutit*

§ 4. Inissianik iluarsaassinissamut, pitsanngorsaannisamut alliliinissamulluunniit tapiiffigineqarnissamik qinnuteqaatit allaganngorlugit kommunimi illup inissisimaffigisaani kommunalbestyrelsimut nassiunneqassapput.

§ 5. Ukiumi aningaasaliiffiusumi februaarip ulluisa aallaqqaataat tapiiffigineqarnissamik qinnuteqaateqarnissamut killigitinneqarpoq. Qinnuteqaatit tiguneqartut ataatsimoortillugit kommunalbestyrelsimut suliarineqassapput tulleriarneqassallutillu. Killigititaasup qaangiutereernerani qinnuteqaatit itigartinneqassapput, taamaattorli tak. imm. 2-3.

*Imm. 2.* Tapiiffigineqarnissamik qinnuteqaatit, ukiumi aningaasaliiffiusumi februaarip ulluisa aallaqqaataata kingorna tiguneqartut tiguneqarnerisa tulleriinneri malillugit, aammalu aningaasaliissutissat missingersuutinut, kommunalbestyrelsip akuerisaannut ilaatinneqarsimappata suliarineqarsinnaapput.

*Imm. 3.* Qinnuteqaatit, ukiumi aningaasaliiffiusumi februaarip ulluisa aallaqqaataata kingorna tiguneqartut, qaliap imaluunniit silami iikkat ussiillisimappata, imaluunniit imermut, kiassarnermut kuuffeqarfimmullu atortulersuutit ajutoorfiusimappata tassanngaannartumik pitsanngorsaannisamut iluarsaassinissamulluunniit tunngasut suliarineqarsinnaapput, aningaasaliissutissat missingersuutinut, kommunalbestyrelsip akuerisaannut ilaatinneqarsimappata.

§ 6. Tapiiffigineqarnissamut qinnuteqaammut ilanngunneqassapput:

- 1) Iluarsaassinissamut, pitsanngorsaannisamut alliliinissamulluunniit kissaatigisamut nassuiaat.
- 2) Inissiaq pillugu nassuiaat, tassunga B-nr., pisoqaassusia, angissusia pitsaassusialu.
- 3) § 7 naapertorlugu suliassamut aningaasartuutissanut tamarmiusunut missingiut neqeroorulluunniit.
- 4) Kommunalborgestrelsimut nunaminertamut inniminniineq imaluunniit nunaminertamik atugassiineq, suliassami pineqartumi nunaminertamik atugassinneqarnissaq pisariaqartinneqarpat.
- 5) Nammineerluni aningaasaliissuteqartoqassappat tassunga uppernarsaat.
- 6) Qinnuteqartup inoqutaasalu najugaqarfiannut uppernarsaat.
- 7) Ukiuni akileraarfiusuni marlunni kingullerni qinnuteqartup inoqutaasalu akissarsiaasa naatsorsorneri.
- 8) Qinnuteqartup inoqutaasalu qaammatinut pingasunut kingullernut akissarsiaasa allagartaat.
- 9) Sillimmasiinnermut atuuttumut akiliisimanermut uppernarsaat.

*Imm. 2.* Kommunalborgestrelsip qinnuteqartoq peqqusinnaavaa, paasissutissanik uppernarsaatinillu, tapiiffigineqarnissamut qinnuteqaatip suliarineqarneranut atugassanik nassiusseqqullugu. Qinnuteqartoq paasissutissanik uppernarsaatissanillu, qaammatisiutit malillugit ullunik 14-init ikinnerunngitsunik piffissaliinerup iluani nassiussisimangippat, kommunalborgestrelsi tapiiffigineqarnissamut qinnuteqaammut itigartitsisinnaavoq.

*Imm. 3.* Tapiiffigineqarnissamut qinnuteqarnermi qinnuteqarnermut immersugassaq, kommunalborgestrelsimut akuerineqartoq atorneqassasoq kommunalborgestrelsi aalajangiisinnaavoq.

§ 7. Suliassami aningaasartuutissanut tamarmiusunut missingersuutit imaluunniit neqeroorut

sanaartornermik ilisimasalimmit suliarineqarsimassaaq, aammalu tassani pilersarusiorneq nakkutilliinerlu, atortussat pisiassat sanasunullu aningaasartuutissat immikkoortiterneqarsimassapput.

§ 8. Kommunalbestyrelsi neriorsuummik nalunaaruteqannginnermini, uku pillugit INI A/S-ip oqaaseqaataanik pissarsiniassaaq:

1) ukiumi qinnuteqarfiusumi februaarip ulluisa aallaqqaataat sioqqullugu qaammatit 60-it kingullit iluanni inissiami, tapiissuteqartoqarnissaanik qinnuteqaateqarfiusumi iluarsaassinermut, pitsannngorsaanermut alliliinermulluunniit Namminersorlutik Oqartussanit tapiisoqarsimanersoq, aamma

2) inissiami maanna piginnittoq taarsigassarsisoralugu Namminersorlutik Oqartussanit taarsigassarsianik ingerlasoqarnersoq imaluunniit naammassereersunik taarsigassarsisoqarsimanersoq.

§ 9. Kommunalbestyrelsi Kalaallit Nunaanni Eqqartuussivimmi nalunaarsuineranut allattaaviup naqinneranik, qinnuteqartup inissiamik atuisinnaatitaaneranut uppersaatissamik pissarsiniassaaq.

§ 10. Kommunalbestyrelsip pisariaqartitsineq malillugu sumiiffimmi tapiiffigineqarnissamut qinnuteqaateqarfiusumi inissiaq qularnaveeqqusiullugu aningaasaateqarfimmit imaluunniit realkredit-imit taarsigassarsisoqarsinnaanersoq pillugu, tamanut atuuttussamik Grønlandsbanken A/S aamma Bank Nordik oqaaseqartissavai.

§ 11. Tapiiffigineqarnissamut qinnuteqaat kommunalbestyrelsimit akuerineqarpat, tapiissuteqarnissamut neriorsuut nalunaarutigineqassaaq. Tapiissuteqarnissamut nalunaarummi suliassat suut neriorsuummi pineqarnersut aningaasartassaasalu amerlassusii allanneqassapput.

*Imm. 2.* Tapiissuteqarnissamut neriorsuummi pilersarusiornermut nakkutilliinermullu, atortunut pisiassanut aamma sanasunut aningaasartuutissanut tapiissutissat immikkoortiterneqassapput. Suut tapiiffigineqartussatut neriorsuuteqarfigineqassanersut aammalu aningaasartassaasat qanoq amerlatigissanersut pillugu kommunalbestyrelsi aalajangiissaaq.

*Imm. 3.* Tapiissutissamut inaarutaasumut akilerneqartussamut suliassat allat ilaatinneqarsinnaanngillat, imaluunniit aningaassat tapiiffigineqarnissamut neriorsuummi aningaasartaliussanit qaffasinnerusinnaanngillat. Aningaasartuutaanerusussat inissiamik, tapiissuteqarnissamut qinnuteqarfiusumik piginnittumit akilerneqassapput.

§ 12. Suliassat tapiissuteqarnissamut neriorsuummi pineqartut ukiumi aningaasaliiffiusumi aallartinneqarsimassapput naammassineqarsimassallutillu. Taamaaangippat tapiissuteqarnissamut neriorsuut siumut ilisimatitsinertaqanngitsumik atorunnaassaaq.

*Imm. 2.* Kommunalbestyrelsi pisuni immikkut ittuni piffissaliussamik saneqqutsinissamut immikkut ittumik akuersissuteqarsinnaavoq. Pissutsit immikkut ittut tassaasinnaapput atortussanik atorineqartussanik tunniussinngitsoorneq imaluunniit tunniussinissamut kinguaattoorneq, suliassap annertussusia assigisaaluunniit. Allatorneqartut tamakkiisumik matussusiinngillat.

### **Kapitali 3**

#### *Tapiissutinik akiliisarneq*

§ 13. Qinnuteqartoq sanasumut imaluunniit sanasunut suliaqartuusunut aningaaserivimmiit akiliinermut uppersaatinik, akiligassiissutip normuanik innersuussiviusumik ilanngussisimangippat, tapiissutissat sanasumut imaluunniit sanasunut suliaqartuusunut akilerneqassapput.

*Imm. 2.* Tapiissutit akilerneqarnissaannut qinnuteqaat sanaartornermut naatsorsuutitut ilanngunneqassaaq, tassanilu suliat, neriorsuummut atasut immikkoortiterneqassapput, aammalu sanasumit imaluunniit sanasunit suliaqartuusunit uppersarneqassallutik.

#### **Kapitali 4**

##### *Atuutilerfia aamma ikaarsaarnermut aalajangersakkat*

§ 14. Nalunaarut manna 1. december 2020-mi atuutilerpoq.

*Imm. 2.* Nalunaarut piffissami atuutsilersiusumi tapiiffiqineqarnissamut qinnuteqaatinut ingerlasunut, sulilu aalajangiiffiqineqanngitsunut atuuppoq.

*Imm. 3.* Kommunalbestyrelsi pisariaqartillugu tapiiffiqineqarnissamut qinnuteqaatini ingerlasuni, kommunalbestyrelsi qinnuteqaammik suliaqarsinnaassappat paasissutissat uppersaatissalluunniit amigaataasinnaasut pillugit qinnuteqartumut ilitsersuisassaaq.

*Namminersorlutik Oqartussat, ulloq 11. november 2020*

Karl Frederik Danielsen

/

Ruth Lindhardt